

摘藻堂四庫全書薈要

史部

欽定四庫全書薈要卷六千七百三十七

史部

明史卷一百四十五

大學士張廷玉等奉 敕修

列傳第三十三

姚廣孝

張

玉

子從子信

輓

朱能

邱

福

李王聰

王火

忠真

譚淵

王

真

陳亨

子房

懋寬

徐劉

理才

姚廣孝長洲人本醫家子年十四度為僧名道衍字斯
道事道士席應真得其陰陽術數之學嘗游嵩山寺相
者袁珙見之曰是何異僧目三角形如病虎性必嗜殺
劉秉忠流也道衍大喜洪武中詔通儒書僧試禮部不
受官賜僧服還經北固山賦詩懷古其儕宗泐曰此豈
釋子語耶道衍笑不答高皇后崩太祖選高僧侍諸王
為誦經薦福宗泐時為左善世舉道衍燕王與語甚合
請以從至北平住持慶壽寺出入府中跡甚密時時屏

人語及太祖崩惠帝立以次削奪諸王周湘代齊岷相繼得罪道衍遂密勸成祖舉兵成祖曰民心向彼奈何道衍曰臣知天道何論民心乃進袁珙及卜者金忠於是成祖意益決陰選將校勾軍卒收材勇異能之士燕邸故元宮地深邃道衍練兵後苑中穴地作重屋繚以厚垣密焚瓠甌瓶缶日夜鑄軍器畜鵝鴨亂其聲建文元年六月燕府護衛百戶倪諒上變詔逮府中官屬都指揮張信輸誠於成祖成祖遂決策起兵適大風雨至

簷瓦墮地成祖色變道衍曰祥也飛龍在天從以風雨
瓦墮將易黃也兵起以誅齊泰黃子澄為名號其衆曰
靖難之師道衍輔世子居守其年十月成祖襲大寧李
景隆乘間圍北平道衍守禦甚固擊却攻者夜縋壯士
擊傷南兵援師至內外合擊斬首無算景隆平安等先
後敗遁成祖圍濟南三月不克道衍馳書曰師老矣請
班師乃還復攻東昌戰敗亡大將張玉復還成祖意欲
稍休道衍力趣之益募勇士敗盛庸破房昭西水寨道

衍語成祖母下城邑疾趨京師京師單弱勢必舉從之
遂連敗諸將於淝河靈壁渡江入京師成祖即帝位授
道衍僧錄司左善世帝在藩邸所接皆武人獨道衍定
策起兵及帝轉戰山東河北在軍三年或旋或否戰守
機事皆決於道行道衍未嘗臨戰陣然帝用兵有天下
道衍力為多論功以為第一永樂二年四月拜資善大
夫太子少師復其姓賜名廣孝贈祖父如其官帝與語
呼少師而不名命蓄髮不肯賜第及兩宮人皆不受常

居僧寺冠帶而朝退仍緇衣出振蘇湖至長洲以所賜金帛散宗族鄉人重修太祖實錄廣孝為監修又與解縉等纂修永樂大典書成帝褒美之帝往來兩都出塞北征廣孝皆留輔太子於南京五年四月皇長孫出閣就學廣孝侍說書十六年三月入覲年八十有四矣病甚不能朝仍居慶壽寺車駕臨視者再語甚懽賜以金唾壺問所欲言廣孝曰僧溥洽繫久願赦之溥洽者建文帝主錄僧也初帝入南京有言建文帝為僧遁去溥

洽知狀或言匿溥洽所帝乃以他事禁溥洽而命給事中胡熒等徧物色建文帝久之不可得溥洽坐繫十餘年至是帝以廣孝言即命出之廣孝頓首謝尋卒帝震悼輟視朝二日命有司治喪以僧禮葬追贈推誠輔國協謀宣力文臣特進榮祿大夫上柱國榮國公諡恭靖賜葬房山縣東北帝親製神道碑誌其功官其養子繼尚寶少卿廣孝少好學工詩與王賓高啓楊孟載友善宋濂蘇伯衡亦推獎之晚著道餘錄頗毀先儒識者鄙

焉其至長洲侯同產姊妹不納訪其友王賓賓亦不見
但遙語曰和尚誤矣和尚誤矣復往見姊妹詈之廣孝
惘然洪熙元年加贈少師配享成祖廟廷嘉靖九年世
宗諭閣臣曰姚廣孝佐命嗣興勞烈具有碩係釋氏之
徒班諸功臣侑食太廟恐不足尊敬祖宗於是尚書李
時偕大學士張璁桂萼等議請移祀大興隆寺太常春
秋致祭詔曰可

張玉字世美祥符人仕元為樞密知院元亡從走漠北

洪武十八年來歸從大軍出塞至捕魚兒海以功授濟南衛副千戶遷安慶衛指揮僉事又從征遠順散毛諸洞北逐元人之擾邊者至鴉寒山還調燕山左護衛從燕王出塞至黑松林又從征野人諸部以驍果善謀畫為王所親任建文元年成祖起兵王帥衆奪北平九門撫諭城內外三日而定師將南玉獻計遣朱能東攻薊州殺馬宣降遵化分兵下永平密雲皆致其精甲以益師擢都指揮僉事是時朝廷遣大兵討燕都督徐凱軍

河間潘忠楊松軍鄭州長興侯耿炳文以三十萬衆軍

真定王進說曰潘楊勇而無謀可襲而俘也成祖命王

將親兵為前鋒抵樓桑值中秋南軍方宴會夜半疾馳

破雄縣忠松來援邀擊於月漾橋生禽之遂克鄭州自

以輕騎覘炳文軍還言軍無紀律其上有敗氣宜急擊

成祖遂引兵西至無極顧諸將謀所嚮諸將以南軍盛

請屯新樂王曰彼雖衆皆新集我軍乘勝徑趨真定破

之必矣成祖喜曰吾倚王足濟大事明日抵真定大破

炳文軍獲副將李堅寯忠都督顧成等斬首三萬復敗
安陸侯吳傑軍燕兵由是大振江陰侯吳高以遼東兵
圍永平曹國公李景隆引數十萬衆將攻北平成祖與
玉謀先援永平至則高遁走玉追斬甚衆遂從間道襲
大寧拔其衆而還次會州初立五軍以玉將中軍時李
景隆已圍北平成祖旋師大戰於鄭村壩景隆敗成祖
乘勝抵城下城中兵鼓譟出內外夾攻南軍大潰明年
從攻廣昌蔚州大同謀報景隆收潰卒號百萬且復至

玉曰兵貴神速先據白溝河以逸待勞駐河上三日景隆至以精騎馳擊復大敗之進拔德州追奔至濟南圍其城三月解圍還尋再出破滄州禽徐凱進攻東昌與盛庸軍遇成祖以數十騎繞出其後庸圍之數重成祖奮擊得出玉不知成祖所在突入陣中力戰格殺數十人被創死年五十八燕兵起轉鬪三年鋒銳甚至是大將一軍奪氣師還北平諸將叩頭請罪成祖曰勝負常事不足計恨失玉耳艱難之際失吾良輔因泣下不

能止諸將皆泣其後譚淵沒於夾河王真沒於淝河雖
悼惜不如王也建文四年六月成祖稱帝贈王都指揮
同知九月甲申追贈榮國公諡忠顯洪熙元年三月加
封河間王改諡忠武與東平王朱能金鄉侯王真榮國
公姚廣孝並侑享成祖廟廷子三人長輔次軌次從
子信輔自有傳軌以功臣子為神策衛指揮使正統五
年英國公輔訴軌毆守墳者斥及先臣詞多悖慢帝命
錦衣衛鞠實錮之尋釋三遷至中府右都督領宿衛景

泰三年加太子太保英宗復位以軌迎立功并封軌文
安伯食祿千二百石天順六年卒贈侯諡忠僖子斌嗣
坐詛咒奪爵軌永樂中入宿衛為錦衣衛指揮僉事從
宣宗征高煦又從成國公朱勇出塞至龜帽山正統十
三年以副總兵征麓川還討貴州叛苗積功為前府右
都督總京營兵景泰二年坐驕淫不道下獄尋釋景帝
不豫與石亨曹吉祥迎上皇於南城封太平侯食祿二
千石于謙王文范廣之死軌有力焉納賄亂政亞于亨

天順二年卒贈裕國公諡勇襄子瑾嗣成化二年革奪
門功奪侯授指揮使信舉建文二年鄉試第一永樂中
厯刑科都給事中數言事擢工部右侍郎奉命視開封
決河請疏魚王口至中灤故道二十餘里詔如其議詳
宋禮傳出治浙江海塘坐事謫交趾洪熙初召為兵部
左侍郎帝嘗謂英國公輔有兄弟可加恩者乎輔頓首
言輓輓蒙上恩備近侍然皆奢侈獨從兄侍郎信賢可
使帝召見信曰是英國公兄耶趣武冠冠之改錦衣衛

指揮同知世襲時去開國未遠武階重故也居職以
平恕稱宣德六年遷四川都指揮僉事在蜀十五年致
仕

朱能字士弘懷遠人父亮從太祖渡江積功至燕山護
衛副千戶能嗣職事成祖藩邸嘗從北征降元太尉多
爾濟布哈燕兵起與張玉謀殺張昺謝貴奪九門授指
揮同知帥衆拔薊州殺馬宣下遵化從破雄縣戰月漾
橋執楊松潘忠降其衆於鄭州長驅至真定大敗耿炳

文軍獨與敢死士三十騎追奔至潯沱河驟馬大呼突
南軍軍數萬人皆披靡蹂藉死者甚衆降三千餘人成
祖以手札勞之進都指揮僉事從援永平走吳高襲克
大寧還將左軍破李景隆於鄭村壩從攻廣昌蔚州大
同戰白溝河為前鋒再敗平安軍進攻濟南次華山南
軍乘高而陣能以奇兵繞其後襲破之降萬餘人從攻
滄州破東門入斬首萬餘級東昌之戰盛庸鐵鉉圍成
祖數重張玉戰死事急能帥周長等殊死鬪翼成祖潰

圍出復從戰夾河譚淵死燕師挫能至再戰再捷軍復振與平安戰蒙城敗之追奔至真定略地彰德定州破西水寨將輕騎千人掠衡水獲指揮賈榮克東阿東平盡破汶上諸寨既而王真戰死淝河燕軍屢敗諸將議旋師能獨按劍曰漢高十戰九敗終有天下今舉事連得勝小挫輒歸更能北面事人耶成祖亦叱諸將曰任公等所之諸將乃不敢言遂引兵南敗平安銀牌軍都督陳暉來援又敗之遂拔靈壁軍禽平安等降十萬衆

累遷右軍都督僉事進克泗州渡淮敗威庸兵拔盱眙

下揚州渡江入金川門九月甲申論功次邱福授奉天

靖難推誠宣力武臣特進榮祿大夫右柱國左軍都督

府左都督封成國公祿二千二百石與世券永樂二年

兼太子太傅加祿千石四年七月詔能佩征夷將軍印

西平侯沐晟為左副將軍由廣西雲南分道討安南帝

親送之龍江十月行次龍州卒於軍年三十七能於諸

將中年最少善戰張玉善謀帝倚為左右手玉歿後軍

中進止悉諮能能身長八尺雄毅開豁居家孝友位列

上公未嘗以富貴驕人善撫士卒卒之日將校皆為流

涕敕葬昌平追封東平王諡武烈洪熙時配享成祖廟

廷子勇嗣以元勲子特見任用厯掌都督府事留守南

京永樂二十二年從北征宣宗即位從平漢庶人征烏

梁海張輔解兵柄詔以勇代勇以南北諸衛所軍備邊

轉運錯互非便請專令南軍轉運北軍備邊又言京軍

多遠戍非居重馭輕之道請選精兵十萬益之又請令

公侯伯都督子弟操練皆報可正統九年出喜峰口擊
朵顏諸部至富峪川而還為兵部尚書徐晞所劾詔不
問尋論功加太保勇賴面虬髮狀貌甚偉勇略不足而
敬禮士大夫十四年從駕至土木迎戰鵠兒嶺中伏死
所帥五萬騎皆沒于譙等追論勇罪奪封景泰元年勇
子儀乞塋祭帝以勇大將喪師辱國致陷乘輿不許已
請襲禮部尚書胡濙主之又以立東宮恩得嗣減歲祿
至千石天順初追封勇平陰王謚武愍儀及子輔皆守

備南京又三傳至希忠從世宗幸承天掌行在左府事
至衛輝行宮夜火希忠與都督陸炳翼帝出由是被恩
遇入直西苑厯掌後右兩府總神機營提督十二團營
及五軍營累加太師益歲祿七百石代郊天者三十九
賞賚不可勝紀卒追封定襄王諡恭靖萬厯十一年以
給事中余懋學言追奪王爵弟希孝亦至都督加太保
卒贈太傅諡忠僖希忠五傳至曾孫純臣崇禎時見倚
任李自成薄京師帝手敕純臣總督中外諸軍輔太子

敕未下城已陷為賊所殺

邱福鳳陽人起卒伍事成祖藩邸積年勞授燕山中護衛千戶燕師起與朱能張玉首奪九門大戰真定突入子城戰白溝河以勁卒擣中堅夾河滄州靈壁諸大戰皆為軍鋒盛庸兵扼淮戰艦數千艘蔽淮岸福與朱能將數百人西行二十里自上流潛濟猝薄南軍庸驚走盡奪其戰艦軍乃得渡累遷至中軍都督同知福為人樸戇驚勇謀畫智計不如玉敢戰深入與能埒每戰勝

諸將爭前效虜獲福獨後成祖每歎曰邱將軍功我自知之即位大封功臣第福為首授奉天靖難推誠宣力武臣特進榮祿大夫右柱國中軍都督府左都督封淇國公祿二千五百石與世券命議諸功臣封賞每奉命議政皆首福漢王高煦數將兵有功成祖愛之福武人與之善數勸立為太子帝猶豫久之竟立仁宗以福為太子太師六年加歲祿千石尋命與蹇義金忠等輔導皇長孫明年七月將大軍出塞至臚朐河敗沒初布尼

雅錫里殺使臣郭驥帝大怒發兵討之命福佩征虜大將軍印充總兵官武城侯王聰同安侯火真為左右副將靖安侯王忠安平侯李遠為左右叅將以十萬騎行帝慮福輕敵諭以兵事須慎重自開平以北即不見寇宜時時如對敵相機進止不可執一一舉未捷俟再舉已行又連賜敕謂軍中有言敵易取者慎勿信之福出塞帥千餘人先至廬朐河南擊敗其游騎遂渡河獲其尚書一人飲之酒問布尼雅錫里所在尚書言聞大兵

來惶恐北去此可三十里福大喜曰當疾馳禽之諸將
請俟諸軍集偵虛實而後進福不從以尚書為鄉導直
薄敵營戰二日每戰敵輒佯敗引去福銳意乘之李遠
諫曰將軍輕信敵閒懸軍轉鬪敵示弱誘我深入必不
利退則懼為所乘獨可結營自固晝揚旂伐鼓出奇兵
與挑戰夜多燃炬鳴礮張軍勢使彼莫測俟我軍畢至
併力攻之必捷否亦可全師而還始上與將軍言何如
而遂忘之乎王聰亦力言不可福皆不聽厲聲曰違命

者斬即先馳麾士卒隨行控馬者皆泣下諸將不得已
與俱俄而敵大至圍之數重聰戰死福及諸將皆被執
遇害年六十七一軍皆沒敗聞帝震怒以諸將無足任
者決計親征奪福世爵徙其家海南李遠懷遠人襲父
職為蔚州衛指揮僉事燕兵攻蔚州舉城降南軍駐德
州運道出徐沛間遠以輕兵六千詐為南軍袍鎧人插
柳一枝於背徑濟寧沙河至沛無覺者焚糧舟數萬河
水盡熱魚鰲皆浮死南將袁宇三萬騎來追伏兵擊敗

之建文四年正月燕軍駐蠡縣遠分哨至藁城遇德州將葛進步騎萬餘乘冰渡滹沱河遠迎擊之進繫馬林間以步兵接戰遠佯却潛分兵出其後解所繫馬再戰進引退失馬遂大敗斬首四千獲馬千匹成祖以歲首大捷賜書嘉勞曰將軍以輕騎八百破敵數萬出奇應變雖古名將不過也復遣哨淮上敗守淮將士斬千餘級累功為都督僉事封安平侯祿千石予世伯券永樂元年偕武安侯鄭亨鎮宣府遠沈毅有膽略言論慷慨

既從邱福出塞至臚朐河諫福不聽師敗遠帥五百騎
突陣殺數百人馬蹶被執罵不絕口死年四十六追封
莒國公諡忠壯子安嗣伯爵洪熙元年為交趾叅將失
律謫為事官己從王通棄交趾還下獄奪券謫赤城立
功英宗即位起都督僉事征阿勒台多爾濟遷都督同
知充總兵官鎮松潘正統六年副定西伯蔣貴征麓川
貴令安駐軍潞江護餉而自帥軍破賊安恥無功聞有
餘賊屯高黎貢山徑往擊之為所敗失士卒千餘人都

指揮趙斌等皆死逮下獄謫戍獨石卒詔授子清都指揮同知王忠孝感人與李遠同降於蔚州每戰帥精騎為奇兵多斬獲累遷都督僉事封靖安侯祿千石出塞戰歿年五十一爵除王聰斬水人以燕山中護衛百戶從起兵取薊州攻遵化徇涿州轉戰在平滑口破南軍獲馬千五百還守保定從次江上略南軍舟濟師累遷都指揮使封武城侯祿千五百石偕同安侯火真備禦宣府屢奉詔巡邊從邱福出塞戰死年五十三追封

漳國公諡武毅子琰嗣聰及遠嘗諫福故得褒卹火真
蒙古人初名科里和珍洪武時歸附為燕山中護衛千
戶從攻真定先馳突耿炳文陣大軍乘之遂捷從襲大
寧戰鄭村壩日暝天甚寒真斂敝鞍熬火成祖前甲士
數人趨附火衛士止之成祖曰吾衣重裘猶寒此皆壯
士勿止也聞者感泣真嘗將騎兵每戰輒有斬獲呼噪
歸營衆服其勇累遷都督僉事封同安侯祿千五百石
出塞戰歿年六十一爵除子孫世襲觀海衛千戶裔孫

斌嘉靖中武舉倭寇浙東帥海舟與賊戰賊然大毬擲
斌舟斌輒手接之還燒賊舟賊屯補陀山斌直搗其營
多殺傷後軍不繼被禽不屈賊支解之官為建祠曰忠
勇

譚淵清流人嗣父職為燕山右護衛副千戶燕兵起從
奪九門破雄縣潘忠楊松自鄭州來援淵帥壯士千餘
人伏月漾橋水中人持芟草一束蒙頭通鼻息南軍已
過即出據橋忠等戰敗趨橋不得渡遂被禽累進都指

揮同知淵驍勇善戰引兩石弓射無不中然性嗜殺滄
州破成祖命給牒散降卒未遣者三千餘人待明給牒
淵一夜盡殺之王怒淵曰此曹皆壯士釋之為後患王
曰如爾言當盡殺敵敵可盡乎淵慚而退夾河之戰南
軍陣動塵起淵遽前搏戰馬蹶被殺成祖悼惜之即位
贈都指揮使追封崇安侯諡壯節立祠祀之子忠從入
京師有功又以淵故封新寧伯祿千石永樂二十年將
右掖從征沙漠宣德元年從征樂安三年坐征交趾失

律下獄論死已得釋卒子璟乞嗣吏部言忠罪死不當

襲帝曰券有免死文其子嗣再傳至孫祐成化中協守

南京還掌前府提督團營累加太傅嗣伯六十九年始

卒諡莊僖子綸嗣嘉靖十四年鎮湖廣勦九溪蠻有功

益祿坐占役軍士奪爵數傳至弘業國亡死於賊

王真咸寧人洪武中起卒伍積功至燕山右護衛百戶

燕兵起攻九門戰永平真定下廣昌徇鴈門從破滄州

追南兵至滑口俘獲七千餘人累遷都指揮使淝河之

戰真與白義劉江各帥百騎誘平安軍縛草置囊中為

束帛狀安追擊真等佯棄囊走安軍士競取之伏發兩

軍鏖戰真帥壯士直前斬馘無算後軍不繼安軍圍之

數匝真被重創連格殺數十人頽左右曰我義不死敵

手遂自刎成祖即位追封金鄉侯諡忠壯真勇健有智

略成祖每追悼之曰奮武如王真何功不成不死功當

冠諸將仁宗時追封寧國公加號効忠子通自有傳

陳亨壽州人元揚州萬戶從太祖於濠為鐵甲長擢千

戶從大將軍達北征守東昌敵數萬奄至亨固守出奇
兵誘敗之復徇未下諸城洪武二年守大同積功至燕
山左衛指揮僉事數從出塞遷北平都指揮使及惠帝
即位擢都指揮僉事燕師起亨與劉真卜萬守大寧移
兵出松亭關駐沙河謀攻遵化燕兵至退保關當是時
李景隆帥五十萬衆將攻北平北平勢弱而大寧行都
司所領興州營州二十餘衛皆西北精銳朵顏泰寧福
餘三衛元降將所統番騎彊卒尤驍勇卜萬將與景隆

軍合成祖懼以計紿亨因萬遂從劉家口間道疾攻大

寧亨及劉真自松亭回救中道聞大寧破乃與指揮徐

理陳文等謀降燕夜二鼓襲劉真營真單騎走廣寧亨

等帥衆降成祖盡拔諸軍及三衛騎卒挾寧王以歸自

是衝鋒陷陣多三衛兵成祖取天下自克大寧始亨理

既降累從破南軍白溝河之戰亨中創幾死已攻濟南

與平安戰華山大敗創甚輿還北平進都督同知成祖

還軍親詣亨第勞問其年十月卒成祖自為文以祭比

即位追封涇國公諡襄敏長子恭嗣都督同知少子懋
初以舍人從軍立功為指揮僉事已而將亨兵功多累
進右都督永樂元年封寧陽伯祿千石六年三月佩征
西將軍印鎮寧夏善撫降卒明年秋故元丞相藏布及
平章司徒國公知院十餘人皆帥衆相繼來降已而平
章多蘭等叛去懋追禽之黑山盡收所部人口畜牧進
侯益祿二百石八年從北征督左掖十一年巡寧夏邊
尋命將山西陝西二都司及鞏昌平涼諸衛兵駐宣府

明年從北征領左哨戰和實袞與成山侯王通先登都督朱崇等乘之遂大捷明年復鎮寧夏二十年從北征領御前精騎破敵奇拉爾河別將五千騎循河東北捕餘寇殲之山澤中師還武安侯鄭亨將輜重先行懋伏隘以待敵來躡伏起縱擊敵死過半還京賜龍衣玉帶冊其女為麗妃明年將陝西寧夏甘肅三鎮兵從征阿嚕台為前鋒又明年復領前鋒從北征成祖之崩於榆木川也六軍在外京師守備虛弱仁宗召懋與陽武侯

薛祿帥精騎三千馳歸衛京師命掌前府加太保與世
侯宣德元年從討樂安還仍鎮寧夏三年奏徙靈州城
得黑白二兔以獻宣宗喜親畫馬賜之懋在鎮久威名
震漠北頗恃寵自恣乾歿鉅萬屢被劾帝曲宥之命所
司徵其賊懋自陳用已盡詔貸免英宗即位命偕張輔
叅議朝政出為平羗將軍鎮甘肅其冬寇掠鎮番懋遣
兵援之解去以斬獲聞叅贊侍郎柴車劾懋失律致寇
又取所遺老弱冒為都指揮馬亮等功受陞賞論斬詔

免死奪其祿久之還祿奉朝請十三年福建賊鄧茂七反
都御史張楷討之無功乃詔懋佩征南將軍印充總兵
官師京營江浙兵往討至浙江有欲分兵振海口者懋
曰是使賊致死於我也明年抵建寧茂七已死餘賊聚
尤溪沙縣諸將欲屠之懋曰是堅賊心也乃下令招撫
賊黨多降分道逐捕悉平之已而沙縣賊復熾久不定
會英宗北狩景帝立遂詔班師言官劾之以賊平不問
仍加太保掌中府兼領宗人府事英宗復位益祿二百

石天順七年卒年八十四贈濬國公諡武靖懋修髯偉

貌聲如洪鐘胸次磊落敬禮士大夫永樂功臣至天順時無在者惟懋久享祿位數廢數起卒以功名終長子晟有罪弟潤嗣潤卒弟瑛嗣減祿之半嗣侯十六年而晟子輔已長乃令輔嗣瑛免為勲衛輔後坐事失侯卒無子復封瑛孫繼祖為侯傳爵至明亡徐理西平人洪武時為永清中護衛指揮僉事改營州衛既降為右軍副將每戰先登有功成祖將襲滄州命理及陳旭潛於

直沽造浮橋以濟師累進都指揮僉事封武康伯還守
北平理馭下寬得士卒心永樂六年卒再傳至孫勇無
子絕封陳文降後為前軍左副將戰小河死於陣房寬
陳州人洪武中以濟寧左衛指揮從徐達練兵北平遂
為北平都指揮同知移守大寧寬在邊久凡山川阨塞
殊域情偽莫不畢知然不能撫士卒燕兵奄至城中縛
寬以降成祖釋之俾領其衆戰白溝河將右軍失利從
克廣昌彰德進都督僉事以舊臣略其過封思恩侯祿

八百石世指揮使永樂七年卒劉才字子才霍邱人元末為元帥明興歸附厯營州中護衛指揮僉事燕師襲太寧才降從戰有功封廣恩伯祿九百石世指揮同知永樂八年從北征督右掖失律議罪既而宥之二十一年偕隆平侯張信理永平山海邊務明年復從北征至懷來以疾還才惻怛無華不為苟合亦不輕訾毀人甚為仁宗所重宣德五年卒

贊曰惠帝承太祖遺威餘烈國勢初張仁聞昭宣衆心

悅附成祖奮起方隅冒不韙以爭天下未嘗有萬全之計也乃道衍首贊密謀發機決策張王朱能之輩戮力行間轉戰無前隕身不顧於是收勁旅摧雄師四年而成帝業意者天之所興羣策羣力應時並濟諸人之得為功臣首也可不謂厚幸哉

明史卷一百四十五

欽定四庫全書

明史卷一百四十五考證

姚廣孝傳住持慶壽寺

臣章宗瀛按慶壽寺又名雙

塔寺金章宗時建見春明夢餘錄及帝京景物略後

又改名大興隆寺大慈恩寺至明嘉靖初廢其地在

西長安街廣孝之居此蓋以其密邇燕邸耳謹附考

姚廣孝傳仍居慶壽寺

臣章宗瀛按燕都遊覽志載

永樂欲為廣孝建第力辭仍居慶壽寺後退居天寧

寺遂以慶壽寺為百官習儀之所傳但言居慶壽寺而不言退居謹附考

姚廣孝傳訪其友王賓賓亦不見臣章宗瀛按明人

記載廣孝至長洲徒步往訪王賓歡若平生賓為作賑災記以鋪陳其功德王鴻緒明史稿採其說輯入傳中此云賓拒不見所記迥然相反豈作記者又一人抑傳聞異詞邪謹識

朱能傳進攻濟南次華山臣章宗瀛按一統志濟南

鐸山惟元和郡志志載華不注山一名華山原本作
鐸山誤刊也謹據改

王真傳成祖以計給亨囚萬臣章宗瀛按陳亨本有
降燕之意特以萬在不敢發燕王用反間計以書貽
萬盛稱萬而詆亨偽置書降卒衣中使同獲者知之
縱還亨發其書萬乃坐罪見典彙謹附考

明史卷一百四十五考證

欽定四庫全書薈要卷六千七百三十九

史部

明史卷一百四十六

大學士張廷玉等奉 敕修

列傳第三十四

張武

陳珪

孟善

鄭亨

徐忠

郭亮

趙彞

張信

唐雲

徐祥

李濬

孫巖房

勝

陳旭

陳賢

張興

陳志

王友

張武瀏陽人豁達有勇力稍涉書史為燕山右護衛百戶從成祖起兵克薊州取雄縣戰月漾橋乘勝抵鄭州與諸將敗耿炳文於真定夾河之戰帥壯士為前鋒突陣佯敗走南軍追之武還擊南軍遂潰攻西水寨前軍

夜失道南軍來追武引兵伏要路擊却之戰小河陳文
歿於陣武帥敢死士自林間突出與騎兵合大破南軍
斬首二萬級溺死無算累授都督同知成祖即位論功
封成陽侯祿千五百石位次朱能下是時候者陳珪鄭
亨孟善火真顧成王忠王聰徐忠張信李遠郭亮房寬
十三人武為第一還守北平永樂元年十月卒出內廐
馬以賻贈潞國公諡忠毅無子爵降

陳珪泰州人洪武初從大將軍徐達平中原授龍虎衛

百戶改燕山中護衛從成祖出塞為前鋒進副千戶已

從起兵積功至指揮同知還佐世子居守累遷都督僉

事封泰寧侯祿千二百石佐世子居守如故永樂四年

董建北京宮殿經畫有條理甚見獎重八年帝北征偕

駙馬都尉袁容輔皇長孫留守北京十五年鑄繕工印

給珪竝設官屬兼掌行在後府十七年四月卒年八十

五贈靖國公諡忠襄子愉嗣二十年從北征失律下獄

死兄子鐘嗣再傳至瀛歿土木贈寧國公諡忠愍弟涇

嗣天順六年鎮廣西明年九月猺賊作亂涇將數千人駐梧州是冬大籐賊數百人夜入城殺掠甚衆涇擁兵不救徵還下獄論斬尋宥之卒子桓嗣弘治初鎮寧夏中貴人多以所親冒功賞桓拒絕之為所譖召還卒數傳至延祚明亡爵除

孟善海豐人仕元為山東樞密院同僉明初歸附從大軍北征授定遠衛百戶從平雲南進燕山中護衛千戶燕師起攻松亭關戰白溝河皆有功已守保定南軍數

萬攻城城中兵纔數千善固守城完累遷右軍都督同知封保定侯祿千二百石永樂元年鎮遼東七年召還北京鬚眉皓白帝憫之命致仕十年六月卒贈滕國公諡忠勇子瑛嗣將左軍再從北征督運餉仁宗即位為左參將鎮交趾坐庶兄常山護衛指揮賢永樂中謀立趙王事竝奪爵毀其券謫雲南宣德六年放還充為事官於宣府英宗卽位授京衛指揮使卒子俊嗣官天順初以恩詔與伯爵卒子昂嗣卒爵除

鄭亨合肥人父用洪武時積功為大興左衛副千戶請
老亨嗣職洪武二十五年應募持檄諭鞬靼至鄂諾河
還遷密雲衛指揮僉事燕師起以所部降戰真定先登
進指揮使襲大寧至劉家口諸將將攻闕成祖慮守關
卒走報大寧得為備乃令亨將勁騎數百卷旆登山潛
出關後斷其歸路急攻之悉縛守關者遂奄至大寧進
北平都指揮僉事夜帥衆破鄭村壩兵西破紫荆關掠
廣昌取蔚州直抵大同還戰白溝河逐北至濟南進都

指揮同知攻滄州軍北門扼餉道東昌戰敗收散卒還
軍深州明年戰夾河藁城掠地至彰德耀兵河上還屯
完縣明年從破東平汶上軍小河戰敗王真死諸將皆
欲北還惟亨與朱能不可入京師歷遷中府左都督封
武安侯祿千五百石予世券留守北京時父用猶在受
封爵視亨永樂元年充總兵官帥武成侯王總安平侯
李遠備宣府亨至邊度宣府萬全懷來形便每數堡相
距中擇一堡可容數堡士馬者為高城深池浚井蓄水

謹瞭望寇至夜舉火晝鳴礮併力堅守規畫周詳後莫
能易三年二月召還旋遣之鎮七年秋備邊聞平明年
帝北征命亨督運出塞將右哨追敗布尼雅錫里大軍
與阿魯台遇亨帥衆先大破之論功冠諸將其冬仍鎮
宣府十二年復從北征領中軍戰和實衮追敵中流矢
却復與大軍合破之二十年復從出塞將左哨帥卒萬
人治龍門道過軍破烏梁海於奇拉爾河將輜重還擊
破寇之追躡者仍守開平成祖凡五出塞亨皆在行仁

宗即位鎮大同洪熙元年二月頒制諭及將軍印於各邊總兵官亨佩征西前將軍印在鎮壘田積穀邊備完固自是大同希寇患宣德元年召掌行後府事已仍鎮大同轉餉宣府招降迤北部長四十九人請於朝厚撫之歸附者相屬九年二月卒於鎮亨嚴肅重厚善撫士卒恥掎克在大同時鎮守中官撓軍政亨裁之以理其人不悅然其卒也深悼惜之贈漳國公諡忠毅妾張氏自經以殉贈淑人子能嗣傳爵至明亡

徐忠合肥人襲父爵為河南衛副千戶累從大軍北征多所俘獲進濟陽衛指揮僉事洪武末鎮開平燕兵破居庸懷來忠以開平降從徇灤河與陳旭拔其城李景隆攻北平燕師自大寧還救至會州置五軍張玉將中軍朱能將左軍李彬將右軍房寬將後軍忠號驍勇使將前軍遂敗陳暉於白河破景隆於鄭村壩白溝河之戰忠單騎突陣一指中流矢未暇去鏃急抽刀斷之控滿疾驅殊死戰燕王乘高見之謂左右曰真壯士也進

攻濟南克滄州大戰東昌夾河攻彰德破西水塞克東
阿東平汶上大戰靈壁遂從渡江入京師自指揮同知
累遷都督僉事封永康侯祿一千一百石予世券忠每
戰摧鋒跳盪為諸將先而馭軍甚嚴所過無擾善撫降
附得其死力事繼母以孝聞夜歸必揖家廟而後入儉
約恭謹未嘗有過成祖北巡以忠老成留輔太子監國
永樂十一年八月卒贈蔡國公諡忠烈傳爵至裔孫錫
登崇禎末死於賊從兄錫蔭嘗襲侯卒無子其妻朱氏

成國公純臣女也夫歿樓居十餘年不履地城陷捧廟
主自焚死

郭亮合肥人為永平衛千戶燕兵至永平與指揮趙彛
以城降即命為守時燕師初起先畧定旁郡邑既克居
庸懷來山後諸州皆下而永平地接山海關障隔遼東
既降北平益無患成祖遂南敗耿炳文於真定既而遼
東鎮將江陰侯吳高都督楊文等圍永平亮拒守甚固
援師至内外合擊高退走未幾高中讒罷楊文代將復

率衆來攻亮及劉江合擊大敗之累進都督僉事成祖
即位以守城功封成安侯祿千二百石世伯爵永樂七
年守開平以不檢聞二十一年三月卒贈興國公諡忠
壯妾韓氏自經以殉贈淑人子晟當嗣伯成宗特命嗣
侯宣德五年坐扈駕先歸革爵尋復之無子弟昂嗣伯
傳爵至明亡趙彛虹人洪武時為燕山右衛百戶從傳
友德北征城宣府萬全懷來擢永平衛指揮僉事降燕
歷諸戰皆有功累遷都指揮使成祖稱帝封忻城伯祿

千石永樂八年鎮宣府嘗從北征坐盜餉下獄得釋尋以呂梁洪湍險命彛鎮徐州經理復以擅殺運丁盜官糧為都御史李慶所劾命法司論治復得釋仁宗立召還宣德初卒子榮嗣數傳至之龍崇禎末協守南京大清兵下江南之龍迎降

張信臨淮人父興永寧衛指揮僉事信嗣官移守普定平越積功進都指揮僉事惠帝初即位大臣薦信謀勇調北平都司受密詔令與張昺謝貴謀燕王信憂懼不

知所為母怪問之信以告母大驚曰不可汝父每言王
氣在燕汝無妄舉滅家族成祖稱病信三造燕邸辭不
見信固請入拜牀下密以情輸成祖成祖懼然起立召
諸將定計起兵奪九門成祖入京師論功比諸戰將進
都督僉事封隆平侯祿千石與世伯券成祖德信甚呼
為恩張欲納信女為妃信固辭以此益見重凡察藩王
動靜諸密事皆命信信怙寵頗驕永樂八年冬都御史
陳瑛言信無汗馬勞忝冒侯爵恣肆貪墨強占丹陽縣

湖八十餘里江陰官田七十餘頃請下有司驗治帝曰
瑛言是也昔中山王有沙洲一區耕農水道所經家僮
阻之以擅利王聞即歸其地於官今信何敢爾命法司
雜治之尋以舊勲不問二十年從北征督運餉大閱於
隰寧信辭疾不至謫充辦事官已而復職仁宗即位加
少師竝支二俸與世侯券宣德元年從征樂安三年帝
巡邊征烏梁海命居守明年督軍萬五千人浚河西務
河道正統七年五月卒於南京贈鄖國公諡恭僖子鏞

自立功為指揮僉事先卒子淳嗣傳爵至明亡有唐雲
者燕山中護衛指揮也不知所自起成祖既殺張昺謝
貴等將士猶據九門閉甕城陳戈戟內向張玉等夜襲
之已克其八惟西直門不下成祖令雲解甲騎馬導從
如平時諭守者曰天子已聽王自制一方汝等急退後
者戮雲於諸指揮中年最長素信謹將士以為不欺遂
散時衆心未附雲告以天意所嚮衆乃定雲從成祖久
出入左右甚見倚任先後出師皆留輔世子南兵數攻

城拒守甚力戰未嘗失利累遷都指揮使成祖稱帝封
新昌伯世指揮使明年七月卒賜賚甚厚

徐祥大冶人初仕陳友諒歸太祖於江州積功至燕山
右護衛副千戶成祖以其謹直命侍左右從起兵轉戰
四年皆有功累進都指揮使成祖即位論功封興安伯
祿千石時封伯者祥及徐理李濬張輔唐雲譚忠孫巖
房勝趙彝陳旭劉才茹瑋王佐陳宣十四人祥第一祥
在諸將中年稍長及封益勤慎永樂二年五月卒年七

十三孫亨嗣十二年從北征為中軍副將至圖拉河獲馬三千還守開平將輕騎往來興和大同備邊後屢從出塞宣德元年以右副將征交趾無功奪爵英宗卽位復之正統九年征烏梁海出界嶺口河北川進侯出鎮陝西召還天順初卒諡武襄子賢嗣伯以跛免朝謁給半祿卒子盛嗣卒無子再從弟良嗣良祖母故小妻也繼祖母定襄伯郭登女至是其孫爭襲朝議以郭氏初嘗適人法不當為正嫡良竟得嗣良時年五十家貧傭

大中橋汲水都督府求興安伯後良乃謝其隣而去僉
書南京中府忤劉瑾革祿二百石傳爵至明亡

李濬和州人父旺洪武中燕山左護衛副千戶濬嗣官
從起兵奪九門招募薊州永平壯勇數千人破南軍於
真定從收大寧鄭村壩之戰帥精騎突陣衆鼓譟乘之
大捷轉戰山東為前鋒至小河猝與南軍遇帥敢死士
先斷河橋南軍不能爭成祖至遂大敗之累遷都指揮
使封襄成伯祿千石永樂元年出鎮江西永新盜起捕

誅其魁尋召還三年十一月卒子隆字彥平年十五嗣封雄偉有將畧數從北征出奇料敵成祖器之既遷都以南京根本地命隆留守仁宗即位命鎮山海關未幾復守南京隆讀書好文論事侃侃清慎守法尤敬禮士大夫在南京十八年前後賜璽書二百餘及召還南京民流涕送之江上正統五年入總禁軍十一年巡大同邊賜寶刀一申飭戒備內外凜凜訖還不僇一人明年卒子珍嗣歿於土木贈侯諡悼僖無子弟瑾嗣成化三

年四川都掌蠻叛命佩征夷將軍印充總兵官往討兵部尚書程信督之師至永寧分六路進瑾與信居中節制盡破諸蠻寨前後斬首四千五百有奇獲鎧仗牲畜無算分都掌地設官建治控制之師還進侯累加太保弘治二年卒贈芮國公諡壯武瑾性寬和能下士兄璉以貌寢不得嗣瑾敬禮甚厚璉卒撫其子郤如己子瑾子黼嗣伯數年卒無子郤得嗣四傳至守錡累典營務加太子少保崇禎初總督京營坐營卒為盜落職憂憤

卒子國禎嗣有口辯嘗召對指陳兵事甚悉帝信以為才十六年命總督京營倚任之而國禎實無他能明年三月李自成犯京師三大營兵不戰而潰再宿城陷賊勒國禎降國禎解甲授命責賄不足被拷折踝自縊死孫巖鳳陽人從太祖渡江累官燕山中護衛千戶致仕燕師起通州守將房勝以城降王以巖宿將使與勝協守南軍至攻城甚急樓堞皆毀巖勝多方捍禦已復突門力戰追奔至張家灣獲餉舟三百累擢都指揮僉事

論功以舊臣有守城功封應城伯祿千石永樂十一年
備開平旋移通州以私憾椎殺千戶奪爵安置交趾已
而復之十六年卒贈侯謚威武子亨嗣傳至明亡爵除
房勝景陵人初從陳友諒來歸累功至通州衛指揮僉
事燕兵起北平勝首以通州降成祖即位以守城功封
富昌伯祿千石世指揮使永樂四年卒

陳旭全椒人父彬從太祖為指揮僉事旭嗣官為會州
衛指揮同知舉城降燕從徇灤河功多力戰真定守德

州盛庸兵至棄城走置不問從入京師封雲陽伯祿千石永樂九年命巡視中都及直隸衛所軍馬城池四年從英國公張輔征交趾為右參將偕豐城侯李彬破西都師還與彬各加祿五百石已而陳季擴叛復從輔往勦輔還又命副沐晟八年以疾卒於軍無子封絕

陳賢壽州人初從太祖立功授雄武衛百戶從征西雲南北征至捕魚兒海皆有功歷燕山右護衛指揮僉事燕師起從諸將轉戰常突陣陷堅軍中稱其驍勇累

遷都督僉事永樂元年四月成祖慮功臣封有遺闕令
邱福等議福等言都督僉事李彬功不在房寬下涇國
公子懋金鄉侯子通俱未襲爵而陳言張興陳志王友
功與劉才等於是封彬豐城侯懋通與賢等四人竝封
伯祿皆千石賢封榮昌伯八年亮神機將軍從北征十
三年十一月卒子智前立功為常山右護衛指揮嗣父
爵宣德中以參將佩征夷將軍印鎮交趾怯不任戰又
與都督方正相失黎利勢盛不能禦敗績奪爵充為事

官從王通立功尋以棄地還下獄得釋正統初復為指揮使

張興壽州人起卒伍為燕山右護衛指揮僉事從起兵功多累還都指揮同知從子勇有力敢戰從興行陣為肘腋興嘗單騎追敵被數十創傷重不任戰以勇嗣指揮使代將其兵再論功興封安鄉伯永樂五年正月卒無子勇嗣永樂八年從北征失律謫交趾赦還復爵卒子安嗣正統十三年鎮廣東蕭養四寇廣州安帥舟師

遇賊於賊船澳安方醉卧官軍不能支退至沙角尾賊薄之軍潰安溺死傳爵至光燦死流寇

陳志巴人洪武中為燕山中護衛指揮僉事從起兵累遷都指揮同知封遂安伯志素以恭謹受知戮力戎行始終不懈永樂八年五月卒孫瑛嗣屢從出塞鎮永平山海薊州城雲州獨石夾閭有將材然貪殘人多怨者卒子埏嗣歿於土木謚榮懷弟韶嗣卒孫鏊嗣總薊州兵朶顏入寇禦却之嘉靖初叙奉迎功加太子太保進

少保委寄亞武定侯郭勛嗣伯六十餘年卒又五傳而明亡

王友荊州人襲父職為燕山護衛百戶從起兵定京師論功當侯以驕縱授都指揮僉事及邱福等議上乃封清遠伯永樂二年充總兵官帥舟師捕倭倭數掠海上友無功帝切責之已大破倭帝喜降敕褒勞尋召還四年從征交趾與指揮柳琮合兵破籌江柵因收普賴諸山斬首三萬七千餘級六年七月進侯加祿五百石與

世泰明年再征交趾為副總兵八年還從北征督中軍
別與劉才築城飲馬河上會知院實納噶欲降帝令友
將士卒先行諭以遇敵相機勦滅友等至與敵相距一
程迂道避之應昌軍中乏食多死者帝震怒屢旨切責
奪其軍屬張輔還令羣臣議罪已而赦之十二年坐妾
告友夫婦誹謗有驗奪爵未幾卒仁宗即位官其子順
為指揮僉事

贊曰張武陳珪諸人或從起藩封或率先歸附皆偏裨

列校非有勇畧智計稱大將材也一旦邁風雲之會剖
符策功號稱佐命與太祖開國諸臣埒酬庸之義不亦
厚歟

明史卷一百四十六終

欽定四庫全書

明史卷一百四十六考證

陳珪傳帝北征偕駙馬都尉袁容輔皇長孫留守北京

舊作趙王留守北京

臣章宗瀛按永樂本紀八年

北征命夏原吉輔皇長孫留守北京此云趙王未知何指考趙王乃高燧封爵永樂七年以其恣行不法誅長史褫冠服賴皇太子救始得免安得有留守之理當從本紀作皇長孫為是謹改

鄭亨傳子能嗣傳爵至明亡

臣章宗瀛按鄭亨子能

嗣爵後坐事命立功邊塞至正統六年始復爵見獻徵錄傳未載謹附考

徐忠傳洪武末鎮開平

臣章宗瀛按徐忠字仲達洪

武末脩禦大寧有破鼐爾布哈功見楊士奇所撰神道碑傳未詳敘謹附考

郭亮傳吳高中讒罷

臣章宗瀛按典彙載吳高守諫

東數攻永平燕王曰高雖怯行事差密楊文勇而無

謀去高文不足慮也乃遺二人書盛譽高詆文互易其函投之二人各以書聞於朝建文遂疑高削爵徙廣西傳所言中讒當指此謹附考

徐祥傳初仕陳友諒歸太祖於江州

臣章宗瀛按祥

仕陳友諒為萬戶於辛丑降明蓋元至正二十一年也見歸有光所撰興安伯世家謹附考

陳志傳孫瑛嗣

臣章宗瀛按勲臣考載志有二子其

嗣爵也長子之子瑄與次子之子瑛爭廷臣議以瑄

適孫當嗣成祖召見令之拈闔瑛竟得爵謹附考

王友傳永樂二年充總兵官帥舟師沿海捕倭
臣章宗瀛按王友帥



巡海在永樂二年五月見本紀傳稱明年蓋因友
與陳賢同封蒙其傳元年四月之文也但與賢傳相
隔數篇而此傳上文未標永樂年號僅云明年無可
考次謹增改

明史卷一百四十六考證



總校官編修臣吳紹濬

欽定四庫全書薈要

史部
明史卷一百四十九

七十五



詳校官員外郎

臣楊世綸

欽定四庫全書薈要卷六千七百四十 史部

明史卷一百四十七

大學士張廷玉等奉 敕修

傳第三十五

解 縉

黃 淮

胡 廣

金幼孜

胡 儼

解縉字大紳吉水人祖子元為元安福州判官兵亂守



義死父開太祖嘗召見論元事欲官之辭去縉幼穎敏
洪武二十一年舉進士授中書庶吉士甚見愛重常侍
帝前一日帝在大庖西室諭縉朕與爾義則君臣恩猶
父子當知無不言縉即日上封事萬言畧曰臣聞今數
改則民疑刑太繁則民玩國初至今將二十載無幾時
不變之法無一日無過之人嘗聞陛下震怒鋤根翦蔓
誅其姦逆矣未聞褒一大善賞延於世復及其鄉終始
如一者也臣見陛下好觀說苑韻府雜書與所謂道德

經心經者臣竊謂甚非所宜也說苑出於劉向多戰國縱橫之論韻府出元之陰氏抄輯穢蕪畧無可採陛下若喜其便於檢閱則願集一二志士儒英臣請得執筆隨其後上汴唐虞夏商周孔下及闕閩濂洛根實精明隨事類別勒成一經上接經史豈非太平制作之一端歟又今六經殘缺禮記出於漢儒踏駁尤甚宜及時刪改訪求審樂之儒大備百王之典作樂書一經以惠萬世尊祀伏羲神農黃帝堯舜禹湯文武臯陶伊尹太公

周公稷契夷益傳說箕子於太學孔子則自天子達於庶人通祀以為先師而以顏曾子思孟子配自閔子以下各祭於其鄉魯之闕里仍建叔梁紇廟贈以王爵以顏路曾皙孔鯉配一洗歷代之因仍肇起天朝之文獻宣不盛哉若夫祀天宜復掃地之規尊祖宜備七廟之制奉天不宜為筵宴之所文淵未備夫館閣之隆太常非俗樂之可肄官妓非人道之所為禁絕倡優易置寺閤執戟陞墀皆為吉士虎賁趣馬悉用俊良除山澤之

禁稅蠲務鎮之征商木輅朴居而土木之工勿起布墾
荒田而四裔之地勿貪釋老之壯者驅之俾復於人倫
經咒之妄者火之俾絕其欺誑絕鬼巫破淫祀省冗官
減細縣痛懲法外之威刑永革京城之工役流十年而
聽復杖八十以無如婦女非帷簿不修毋令逮繫大臣
有過惡當誅不宜加辱治歷明時授民作事但申播植
之宜何用建除之謬所宜著者日月之行星辰之次仰
觀俯察事合逆順七政之齊正此類也近年以來臺綱

不肅以刑名輕重為能事以問因多寡為勲勞甚非所以勵清要長風采也御史糾彈皆承密旨每聞上有赦宥則必故為執持意謂如此則上恩愈重此皆小人趨媚効勞之細術陛下何不肝膽而鏡照之哉陛下進人不擇賢否授職不量重輕建不為君用之法所謂取之盡錙銖置朋姦倚法之條所謂用之如泥沙監生進士經明行修而多屈於下僚孝廉人材冥蹈瞽趨而或布於朝省椎埋嚙悍之夫闖茸下愚之輩朝捐刀鎗暮擁

冠裳左棄筐篋右綰組符是故賢者羞為之等列庸人
悉習其風流以貪婪苟免為得計以廉潔受刑為飾辭
出於吏部者無賢否之分入於刑部者無枉直之判天
下皆謂陛下任喜怒為生殺而不知皆臣下之乏忠良
也古者善惡鄉鄰必記今雖有申明旌善之舉而無黨
庠鄉學之規互知之法雖嚴訓告之方未備臣欲求古
人治家之禮睦鄰之法若古藍田呂氏之鄉約今義門
鄭氏之家範布之天下世臣大族率先以勸旌之復之

為民表帥將見作新於變至於比屋可封不難矣陛下
天資至高合於道微神怪妄誕臣知陛下洞矚之矣然
猶不免所謂神道設教者臣謂不必然也一統之輿圖
已定矣一時之人心已服矣一切之姦雄已懼矣天無
變災民無患害聖躬康寧聖子聖孫繼繼繩繩所謂得
真符者矣何必興師以取寶為名諭眾以神仙為徵應
也哉臣觀地有盛衰物有盈虛而商稅之征率皆定額
是使其或盈也姦黠得以侵欺其歛也良善困於補納

夏稅一也而茶椒有糧粟絲有稅既稅於所產之地又稅於所過之津何其奪民之利至於如此之密也且多貧下之家不免拋荒之咎今日之土地無前日之生植而今日之徵聚有前日之稅糧或賣產以供稅產去而稅存或賠辦以當役役重而民困土田之高下不均起科之輕重無別膏腴而稅反輕瘠鹵而稅反重欲拯困而革其弊莫若行授田均田之法兼行常平義倉之舉積之以漸至有九年之食無難者臣聞仲尼曰王公設

險以守其國近世狃於晏安墮名城銷鋒鏑禁兵諱武
以為太平一旦有不測之虞連城望風而靡及今宜敕
有司整葺寬之以歲月守之以里胥額設弓手兼教民
兵開武舉以收天下之英雄廣鄉校以延天下之俊乂
古時多有書院學田貢士有莊義田有族皆宜興復而
廣益之夫罪人不孥罰弗及嗣連坐起於秦法孥戮本
於偽書今之為善者妻子未必蒙榮有過者里胥必陷
其罪況律以人倫為重而有給配婦女之條聽之於不

義則又何取夫節義哉此風化之所由也孔子曰名不正則言不順尚書侍郎內侍也而以加於六卿郎中員外內職也而以名於六屬御史詞臣所以居寵臺閣郡守縣令不應迴避鄉邦同寅協恭相倡以禮而今內外百司捶楚屬官甚於奴隸是使柔懦之徒蕩無廉耻進退奔趨肌膚不保甚非所以長孝行勵節義也臣以為自今非犯罪惡解官笞杖之刑勿用確科督厲小有過差蒲鞭示辱亦足懲矣臣但知罄竭愚衷急於陳獻畧

無次序惟陛下幸垂鑒焉書奏帝稱其才已復獻太平
十策文多不錄縉嘗入兵部索兒隸語嫚尚書沈滑以
聞帝曰縉以冗散自恣耶命改為御史韓國公李善長
得罪死縉代郎中王國用草疏白其寃又為同官夏長
文草疏劾都御史袁泰泰深銜之時近臣父皆得入覲
縉父開至帝謂曰大器晚成若以而子歸益令進學後
十年來大用未晚也歸八年太祖崩縉入臨京師有司
劾縉違詔旨且母喪未葬父年九十不當舍以行謫河

州衛吏時禮部侍郎董倫方為惠帝所信任縉因寓書

於倫曰縉率易狂愚無所避忌數上封事所言分封勢

重萬一不幸必有厲長吳淠之虞納克楚來歸欽承顧

問謂宜待之有禮稍忤機權其徒必貳此類非一頗皆

億中又嘗為王國用草諫書言韓國事為詹徽所疾欲

中以危法伏蒙聖恩申之慰諭重以錙賜令以十年著

述冠帶來廷元史舛誤承命改修及踵成宋書刪定禮

經凡例皆已留中奉親之暇杜門纂述漸有次第將

八載賓天之訃忽聞痛切欲絕母喪在殯未遑安厝家有九十之親倚門望思皆不暇戀冀一拜山陵隕淚几土何圖詿誤蒙恩遠行揚粵之人不耐寒暑復多疾病俯仰奔趨伍於吏卒誠不堪忍晝夜涕泣恒懼不測負平生之心抱萬古之痛是以數鳴知感冀還京師得望天顏或遂南還父子相見即更生之日也倫乃薦繒召為翰林待詔成祖入京師擢侍讀命與黃淮楊士奇胡廣金幼孜楊榮胡儼竝直文淵閣預機務內閣預機務

自此始尋進侍讀學士奉命總裁太祖實錄及列女傳
書成賜銀幣永樂二年皇太子立進縉翰林學士兼右
春坊大學士帝嘗召縉等曰爾七人朝夕左右朕嘉爾
勤慎時言之宮中恒情慎初易保終難願共勉焉因各
賜五品服命七人命婦朝皇后於柔儀殿后勞賜備至
又以立春日賜縉等金綺衣與尚書埒縉等入謝帝曰
代言之司機密所繫且旦夕侍朕裨益不在尚書下也
一日帝御奉天門諭六科諸臣直言因顧縉等曰王魏

之風世不多有若使進言者無所懼聽言者無所忤天下何患不治朕與爾等共勉之其年秋胡儼出為祭酒縉等六人從容獻納帝嘗虛已以聽縉少登朝才高任事直前表裏洞達引拔士類有一善稱之不容口然好臧否無顧忌廷臣多害其寵又以定儲議為漢王高煦所忌遂致敗先是儲位未定淇國公邱福言漢王有功宜立帝密問縉縉稱皇長子仁孝天下歸心帝不應縉又頓首曰好聖孫謂宣宗也帝頷之太子遂定高煦由

是深恨縉會大發兵討安南縉諫不聽卒平之置郡縣而太子既立又時時失帝意高煦寵益隆禮秩踰嫡縉又諫曰是啓爭也不可帝怒謂其離間骨肉恩禮寢衰四年賜黃淮等五人二品紗羅衣而不及縉久之福等議稍稍傳達外廷高煦遂譖縉洩禁中語明年縉坐廷試讀卷不公謫廣西布政司叅議既行禮部郎中李至剛言縉怨望改交趾命督餉化州永樂八年縉奏事入京值帝北征縉謁皇太子而還漢王言縉伺上出私覲

太子徑歸無人臣禮帝震怒縉時方偕檢討王偁道廣東覽山川上疏請鑿贛江通南北奏至逮縉下詔獄拷掠備至詞連大理丞湯宗宗人府經歷高得陽中允李貫贊善王汝玉編修朱紘檢討蔣驥潘畿蕭引高并及至剛皆下獄汝玉貫紘引高得陽皆瘐死十三年錦衣衛帥紀綱上囚籍帝見縉姓名曰縉猶在耶綱遂醉縉酒埋積雪中立死年四十七籍其家妻子宗族徙遼東方縉居翰林時內官張興恃寵答人左順門外縉叱之

興歛乎退帝嘗書廷臣名命縉各疏其短長縉言蹇義
天資厚重中無定見夏原吉有德量不遠小人劉儁有
才幹不知顧義鄭賜可謂君子頗短於才李至剛誕而
附勢雖才不端黃福秉心易直確有執守陳瑛刻於用
法尚能持廉宋禮戇直而苛人怨不卹陳洽疏通警敏
亦不失正方賓簿書之才馭僧之心帝以付太子太子
因問尹昌隆王汝玉縉對曰昌隆君子而量不弘汝玉
文翰不易得惜有市心耳後仁宗即位出縉所疏示楊

士奇曰人言縉狂觀所論列皆有定見不狂也詔歸縉
妻子宗族縉初與胡廣同侍成祖宴帝曰爾二人生同
里長同學仕同官縉有子廣可以女妻之廣頓首曰臣
妻方娠未卜男女帝笑曰定女矣已而果生女遂約婚
縉敗子禎亮徙遼東廣欲離婚女截耳誓曰薄命之婦
皇上主之大人面承之有死無二及赦還卒歸禎亮正
統元年八月詔還所籍家產成化元年復縉官贈朝議
大夫始縉言漢王及安南事得禍後高煦以叛誅安南

數反置吏未久復棄去悉如縉言縉兄綸洪武中亦官御史性剛直後改應天教授子禎期以書名

黃淮字宗豫永嘉人父性方國珍據溫州遜跡避偽命淮舉洪武末進士授中書舍人成祖即位召對稱旨命與解縉常立御榻左備顧問或至夜分帝就寢猶賜坐榻前語機密重務悉預聞既而與縉等六人竝直文淵閣改翰林編修進侍讀議立太子淮請立嫡以長太子立遷左庶子兼侍讀永樂五年解縉黜淮進右春坊大

學士明年與胡廣金幼孜楊榮楊士奇同輔導太孫七年帝北巡命淮及蹇義金忠楊士奇輔太子監國十一年再北巡仍留守明年帝征衛拉特還太子遣使迎稍緩帝重入高煦譖悉徵東宮官屬下詔獄淮及楊溥金問皆坐擊十年仁宗即位復官尋擢為通政使兼武英殿大學士與楊榮金幼孜楊士奇同掌內制丁母憂乞終制不許明年進少保戶部尚書兼大學士如故仁宗崩太子在南京漢王久蓄異志中外疑懼淮憂危嘔血

宣德元年帝親征樂安命淮居守明年以疾乞休許之
父性年九十奉養甚歡及性卒賜葬祭淮詣闕謝值燈
時賜遊西苑詔乘肩輿登萬歲山命主會試比辭歸餞
之太液池帝為長歌送之且曰朕生日卿其復來明年
入賀英宗立再入朝正統十四年六月卒年八十三謚
文簡淮性明果達於治體永樂中長沙妖人李法良反
仁宗方監國命豐城侯李彬討之漢王忌太子有功詭
言彬不可用淮曰彬老將必能滅賊願急遣彬卒禽法

良又時有告黨逆者淮言於帝曰洪武末年已有敕禁
不宜復理吏部追論靖難兵起時南人官北地不即歸
附者當編戍淮曰如是恐示人不廣帝皆從之阿嚕台
歸款請得役屬吐蕃諸部求朝廷刻金作誓詞磨其金
酒中飲諸酋長以盟衆議欲許之淮曰彼勢分則易制
一則難圖矣帝顧左右曰黃淮論事如立高岡無遠不
見西域僧大寶法王來朝帝將刻玉印賜之以璞示淮
淮曰朝廷賜諸番制敕用敕命廣運二寶今此玉較大

非所以示遠人尊朝廷帝嘉納其獻替類如此然量頗隘同列有小過輒以聞或謂解縉之謫淮有力焉其見疎於宣宗也亦謂楊榮言淮病瘵能染人云

胡廣字光大吉水人父子祺名壽昌以字行陳友諒陷吉安太祖遣兵復之將殺脅從者千餘人子祺走謁帥力言不可得免洪武三年以文學選為御史上書請都闕中帝稱善遣太子巡視陝西後以太子薨不果子祺出為廣西按察僉事改知彭州所至平冤獄毀淫祀修

廢堰民甚德之遷延平知府卒於任廣其次子也建文
二年廷試時方討燕廣對策有親藩陸梁人心搖動語
帝親擢廣第一賜名靖授翰林修撰成祖即位廣偕解
縉迎附擢侍講改侍讀復名廣遷右春坊右庶子永樂
五年進翰林學士兼左春坊大學士帝北征與楊榮金
幼孜從數召對帳殿或至夜分過山川阨塞立馬議論
行或稍後輒遣騎四出求索嘗失道脫衣乘驛馬渡河
水沒馬及腰以上帝顧勞良苦廣善書每勒石皆命書

之十二年再北征皇長孫從命廣與榮幼孜軍中講經
史十四年進文淵閣大學士兼職如故帝徵烏斯藏僧
作法會為高帝高后薦福言見諸祥異廣乃獻聖孝瑞
應頌帝綴為佛曲令宮中歌舞之禮部郎中周納請封
禪廣言其不可遂不許廣上却封禪頌帝益親愛之廣
性縝密帝前所言及所治職務出未嘗告人時人以方
漢胡廣然頗能持大體奔母喪還朝帝問百姓安否對
曰安但郡縣窮治建文時姦黨株及支親為民厲帝納

其言十六年五月卒年四十九贈禮部尚書謚文穆文臣得謚自廣始喪還過南京太子為致祭明年官其子種翰林檢討仁宗立加贈廣少師

金幼孜名善以字行新淦人建文二年進士授戶科給事中成祖即位改翰林檢討與解縉等同直文淵閣遷侍講時翰林坊局臣講書東宮皆先具經義閣臣閱正呈帝覽乃進講解縉書楊士奇易胡廣詩幼孜春秋因進春秋要旨三卷永樂五年遷右諭德兼侍講因諭吏

部直內閣諸臣胡廣金幼孜等考滿勿改他任七年從
幸北京明年北征幼孜與廣榮扈行駕駐清水源有泉
湧出幼孜獻銘榮獻詩皆勞以上尊帝重幼孜文學所
過山川要害輒命記之幼孜擬鞍起草後使衛拉特還
帝召幼孜等傍輿行言敵中事親倚甚嘗與廣榮以及
侍郎金純夫道陷谷中暮夜幼孜陞馬廣純去不顧榮
為結鞍行行又輒陞榮乘以已騎明日始達行在所是
夜帝遣使十餘輩迹榮幼孜不獲此至帝喜動顏色自

後北征皆從所撰有北征前後二錄十二年命與廣榮等纂五經四書性理大全遷翰林學士十八年與榮竝進文淵閣大學士二十二年從北征中道兵疲帝以問羣臣莫敢對惟幼孜言不宜深入不聽次開平帝謂榮幼孜曰朕夢神人語上帝好生者再是何祥也榮幼孜對曰陛下此舉固在除暴安民然火災鳧岡玉石俱燬惟陛下留意帝然之即命草詔招諭諸部還軍至榆木川帝崩秘不發喪榮計京師幼孜護梓宮歸仁宗即位

拜戶部右侍郎兼文淵閣大學士尋加太子少保兼武英殿大學士是年十月命幼孜榮士奇會錄罪囚於承天門外詔法司錄重囚必會三學士委寄益隆帝御西角門閱廷臣制誥顧三學士曰汝三人及蹇夏二尚書皆先帝舊臣朕方倚以自輔嘗見前代人主惡聞直言雖素所親信亦畏威順旨緘默取容賢良之臣言不見聽退而杜口朕與卿等當深用為戒因取五人誥詞親增二語云勿謂崇高而難入勿以有所從違而或怠幼

孜等頓首稱謝洪熙元年進禮部尚書兼大學士學士
如故竝給三俸尋乞歸省母明年母卒宣宗立詔起復
修兩朝實錄充總裁官三年持節寧夏冊慶府郡王妃
所過詢兵民疾苦還奏之帝嘉納焉從巡邊度鷄鳴山
帝曰唐太宗恃其英武征遼嘗過此山幼孜對曰太宗
尋悔此後故建憫忠閣帝曰此山崩於元順帝時為元
亡徵對曰順帝亡國之主雖山不崩國亦必亡宣德六
年十二月卒年六十四贈少保謚文靖幼孜簡易靜默

寬裕有容眷遇雖隆而自處益謙名其宴居之室曰退
庵疾革時家人囑請身後恩不聽曰此君子所恥也

胡儼字若思南昌人少嗜學於天文地理律歷醫卜無
不究覽洪武中以舉人授華亭教諭能以師道自任母
憂服除改長垣乞便地就養復改餘干學官許乞便地
自儼始建文元年薦授桐城知縣鑿桐陂水溉田為民
利縣有虎傷人儼齋沐告於神虎遁去桐人祀之朱邑
祠四年副都御史練子寧薦於朝曰儼學足達天人智

足資帷幄比召至燕師已渡江成祖即位曰儼知天文
其令欽天監試既試奏儼實通象緯氣候之學尋又以
解縉薦授翰林檢討與縉等俱直文淵閣還侍講進左
庶子父喪起復儼在閣承顧問嘗不欲先人然少戇永
樂二年九月拜國子監祭酒遂不預機務時用法嚴峻
國子生託事告歸者坐戍邊儼至即奏除之七年帝幸
北京召儼赴行在明年北征命以祭酒兼侍講掌翰林
院事輔皇太孫留守北京十九年改北京國子監祭酒

當是時海內混一垂五十年帝方內興禮樂外懷要荒
公卿大夫彬彬多文學之士儼館閣宿儒朝廷大著作
多出其手重修太祖實錄永樂大典天下圖誌皆充總
裁官居國學二十餘年以身率教動有師法洪熙改元
以疾乞休仁宗賜敕獎勞進太子賓客仍兼祭酒致仕
復其子孫宣宗即位以禮部侍郎召辭歸家居二十年
方岳重臣咸待以師禮儼與言未嘗及私自處淡泊歲
時衣食纔給初為湖廣考官得楊溥文大異之題其上

曰必能為董子之正言而不為公孫之阿曲世以為知人正統八年八月卒年八十三

贊曰明初罷丞相分事權於六部成祖始命儒臣直文淵閣預機務沿及仁宣而閣權日重實行丞相事解縉以下五人則詞林之最初入閣者也夫處禁密之地必以公正自持而尤貴於厚重不洩縉少年高才自負匡濟大畧太祖俾十年進學愛之深矣彼其動輒得謗不克令終夫豈盡嫉賢害能者力固使之然歟黃淮功在

輔導金幼孜勞著扈從胡儼久於國學觀諸臣從容密
勿隨事納忠固非僅以文字翰墨為勲績而已也惟廣
大節有虧能無媿於同列歟

明史卷一百四十七

欽定四庫全書

明史卷一百四十七考證

解縉傳納克楚來歸欽承顧問謂宜待之以禮

臣章

宗瀛按納克楚自明屯金山為邊患至洪武二十年始降封海西侯縉所云待之以禮當指此納克楚原文作納哈出傳文又作邨哈木音轉既訛字面亦參差互異謹畫一改對而考其誤

解縉傳因各賜五品服

臣章宗瀛按明史職官志翰

林學士左右春坊大學士俱正五品縉時已遷官不應再賜五品服當在官侍讀時明制講讀俱六品也傳追敘其初入閣時事耳謹識

解縉傳縉兄綸洪武中亦官御史

臣章宗瀛按解縉

與兄綸同舉進士時年十四見獻徵錄傳未載謹附考

胡儼傳洪武中以舉人授華亭教諭

臣章宗瀛按胡

儼以洪武丁卯舉人中次年會試副榜授教諭見明

黃佐所撰儼傳謹附考

贊曰黃佐功在輔導金幼孜勞著扈從胡儼久於國學
胡廣大節有虧能無媿於同列歟舊本作胡廣金幼
孜勞著扈從臣章宗瀛按胡廣名位雖與諸人同
而呼豬一事實虧大節傳於廣不加貶詞殊非史體
擬於結處另敘二語謹識

明史卷一百四十七考證

欽定四庫全書薈要卷六千七百四十一史部

明史卷一百四十八

大學士張廷玉等奉 敕修

列傳第三十六

楊士奇

楊 榮

曾孫旦

楊 溥

馬 愉

楊士奇名寓以字行泰和人早孤隨母適羅氏已而復宗貧甚力學授徒自給多游湖湘間館江夏最久建文

初集諸儒修太祖實錄士奇已用薦徵授教授當行王叔英復以史才薦遂召入翰林充編纂官尋命吏部考第史館諸儒尚書張統得士奇策曰此非經生言也奏第一授吳王府審理副仍供職成祖即位復改編修已簡入內閣典機務數月進侍讀永樂二年選宮僚以士奇為左中允五年進左諭德士奇奉職甚謹私居不言公事雖至親厚不得聞在帝前舉止恭慎善應對言事輒中人有小過嘗為掩覆之廣東布政使徐奇載嶺南

土物饋廷臣或得其目籍以進帝閱無士奇名召問對
曰奇赴廣時羣臣作詩文贈行臣適病弗預以故獨不
及今受否未可知且物微當無他意帝遽命燬籍六年
帝北巡命與蹇義黃淮留輔太子太子喜文辭贊善王
汝玉以詩法進士奇曰殿下當留意六經暇則觀兩漢
詔令詩小技不足為也太子稱善初帝起兵時漢王數
力戰有功帝許以事成立為太子既而不得立怨望帝
又憐趙王年少寵異之由是兩王合而間太子帝頗心

動九年還南京召士奇問監國狀士奇以孝敬對且曰
殿下天資高即有過必知知必改存心愛人決不負陛
下託帝悅十一年正旦日食禮部尚書呂震請勿罷朝
賀侍郎儀智持不可士奇亦引宋仁宗事力言之遂罷
賀明年帝北征士奇仍輔太子居守漢王譖太子益急
帝還以迎駕緩盡徵東宮官黃淮等下獄士奇後至宥
之召問太子事士奇頓首言太子孝敬如初凡所稽遲
皆臣等罪帝意解行在諸臣交章劾士奇不當獨宥遂

下錦衣衛獄尋釋之十四年帝還京師微聞漢王奪嫡謀及諸不軌狀以問蹇義義不對乃問士奇對曰臣與義俱侍東宮外人無敢為臣兩人言漢王事者然漢王兩遣就藩皆不肯行今知陛下將徙都輒請留守南京惟陛下熟察其意帝默然起還宮居數日帝盡得漢王事削兩護衛處之樂安明年進士奇翰林學士兼故官十九年改左春坊大學士仍兼學士明年復坐輔導有闕下錦衣衛獄旬日而釋仁宗即位擢禮部侍郎兼華

蓋殿大學士帝御便殿蹇義夏原吉奏事未退帝望見
士奇謂二人曰新華蓋學士來必有讜言試共聽之士
奇入言恩詔減歲供甫下二日惜薪司傳旨徵棗八十
萬斤與前詔戾帝立命減其半服制二十七日期滿呂
震請即吉士奇不可震厲聲叱之蹇義兼取二說進明
日帝素冠麻衣經而視朝廷臣惟士奇及英國公張輔
服如之朝罷帝謂左右曰梓宮在殯易服豈臣子所忍
言士奇執是也進少保與同官楊榮金幼孜並賜繩愆

糾繆銀章得密封言事尋進少傅時藩司守令來朝尚書李慶建議發軍伍餘馬給有司歲課其駒士奇曰朝廷選賢授官乃使牧馬是貴畜而賤士也何以示天下後世帝許中旨罷之已而寂然士奇復力言又不報有頃帝御思善門召士奇謂曰朕向者豈真忘之聞呂震李慶輩皆不喜卿朕念卿孤立恐為所傷不欲因卿言罷耳今有辭矣手出陝西按察使陳智言養馬不便疏使草敕行之士奇頓首謝羣臣習朝正旦儀呂震請用

樂士奇與黃淮疏止未報士奇復奏待庭中至夜漏十刻報可越日帝召謂曰震每事誤朕非卿等言悔無及命兼兵部尚書竝食三祿士奇辭尚書祿帝監國時憾御史舒仲成至是欲罪之士奇曰陛下即位詔向忤旨者皆得宥若治仲成則詔書不信懼者衆矣如漢景帝之待衛綰不亦可乎帝即罷弗治或有言大理卿虞謙言事不密帝怒降一官士奇為白其固得復秩又大理少卿弋謙以言事得罪士奇曰謙應詔陳言若加之罪

則羣臣自此結舌矣帝立進謙副都御史而下敕引過時有上書頌太平者帝以示諸大臣皆以為然士奇獨曰陛下雖澤被天下然流徙尚未歸瘡痍尚未復民尚艱食更休息數年庶幾太平可期帝曰然因頌蹇義等曰朕待卿等以至誠望匡弼惟士奇曾五上章卿等皆無一言豈果朝無闕政天下太平耶諸臣慚謝是年四月帝賜士奇璽書曰往者朕膺監國之命卿侍左右同心合德徇國忘身屢歷艱虞曾不易志及朕嗣位以來

嘉謨入告期予於治貞固不二簡在朕心茲創制楊貞
一印賜卿尚克交修以成明良之譽尋修太宗實錄與
黃淮金幼孜楊溥俱充總裁官未幾帝不豫召士奇與
蹇義黃淮楊榮至思善門命士奇書敕召太子於南京
宣宗即位修仁宗實錄仍充總裁宣德元年漢王高煦
反帝親征平之師還次獻縣之單家橋侍郎陳山迎謁
言漢趙二王實同心請乘勢襲彰德執趙王楊榮力贊
之因傳旨令士奇草敕詰趙王士奇曰事當有實天地

鬼神可欺乎榮厲聲曰汝欲撓大計耶士奇曰太宗皇帝三子今上惟兩叔父有罪者不可赦其無罪者宜厚待之疑則防之使無虞而已何遽加兵傷皇祖在天意乎時惟楊溥與士奇合將入諫榮先入二人繼之聞者不納尋召義原告入二人以士奇言白帝帝初無罪趙意移兵事得寢比還京帝思士奇言謂曰今議者多言趙王事奈何士奇曰趙最親陛下當保全之母惑羣言帝曰吾欲封羣臣章示王令自處何如士奇曰善更得

一璽書幸甚於是發使奉書至趙趙王得書大喜泣曰

吾生矣即上表謝且獻護衛言者始息帝待趙王日益

親而薄陳山謂士奇曰趙王所以全卿力也賜金幣時

交趾數叛屢發大軍征討皆敗沒交趾黎利遣人偽請

立陳氏後帝亦厭兵欲許之英國公張輔尚書蹇義以

下皆言與之無名徒示弱天下帝召士奇榮謀二人力

言陛下卹民命以綏荒服不為無名漢棄珠厓前史以

為美談不為示弱許之便尋命擇使交趾者蹇義薦伏

伯安曰辨士奇曰言不忠信雖蠻貊之邦不可行伯安
小人往且辱國帝是之別遣使於是棄交趾罷兵歲省
軍興鉅萬五年春帝奉皇太后謁陵召英國公張輔尚
書蹇義及士奇榮幼孜溥朝太后於行殿太后慰勞之
帝又語士奇曰太后為朕言先帝在青宮惟卿不憚觸
忤先帝能從以不敗事又誨朕當受直言士奇對曰此
皇太后盛德之言願陛下念之尋敕鴻臚寺士奇老有
疾趨朝或後母論奏帝嘗微行夜幸士奇宅士奇倉皇

出迎頓首曰陛下奈何以社稷宗廟之身自輕帝曰朕欲與卿一言故來耳後數日獲二盜有異謀帝召士奇告之故且曰今而後知卿之愛朕也帝以四方屢水旱召士奇議下詔寬恤免災傷租稅及官馬虧額者士奇因請竝蠲逋賦薪芻錢減官田額理冤滯汰工役以廣德意民大悅踰二年帝謂士奇曰恤民詔下已久今更有可恤者乎士奇曰前詔減官田租戶部徵如故帝怫然曰今首行之廢格者論如法士奇復請撫逃民察墨

吏舉文學武勇之士令極刑家子孫皆得仕進又請廷臣三品以上及二司官各舉所知備方面郡守選皆報可當是時帝勵精圖治士奇等同心輔佐海內號為治平帝乃倣古君臣豫遊事每歲首賜百官旬休車駕亦時幸西苑萬歲山諸學士皆從賦詩賡和從容問民間疾苦有所論奏帝皆虛懷聽納帝之初即位也內閣臣七人陳山張瑛以東宮舊恩入不稱出為他官黃淮以疾致仕金幼孜卒閣中惟士奇榮溥三人榮疏闡果毅

遇事敢為數從成祖北征能知邊將賢否阨塞險易遠近敵情順逆然頗通饋遺邊將歲時致良馬帝頗知之以問士奇士奇力言榮曉暢邊務臣等不及不宜以小胥介意帝笑曰榮嘗短卿及原吉卿乃為之地耶士奇曰願陛下以曲容臣者容榮帝意乃解其後語稍稍聞榮以此愧士奇相得甚歡帝亦益親厚之先後所賜珍果牢醴金綺衣幣書器無算宣宗崩英宗即位方九齡軍國大政闕白太皇太后太后推心任士奇榮溥三人

有事遣中使詣閣諮議然後裁決三人者亦自信侃侃
行意士奇首請練士卒嚴邊防設南京叅贊機務大臣
分遣文武鎮撫江西湖廣河南山東罷領事校尉又請
以次蠲租稅慎刑獄嚴覈百司皆允行正統之初朝政
清明士奇等之力也三年宣宗實錄成進少師四年乞
致仕不允敕歸省墓未幾還是時中官王振有寵於帝
漸預外庭事導帝以嚴御下大臣往往下獄靖江王佐
敬私饋榮金榮先省墓歸不之知振欲借以傾榮士奇

力解之得已榮尋卒士奇溥益孤其明年遂大興師征
麓川帑藏耗費士馬物故者數萬又明年太皇太后崩
振勢益盛大作威福百官小有牴牾輒執而繫之廷臣
人人惴恐士奇亦弗能制也士奇既耄子稷傲很嘗侵
暴殺人言官交章劾稷朝議不即加法封其狀示士奇
復有人發稷橫虐數十事遂下之理士奇以老疾在告
天子恐傷士奇意降詔慰勉士奇感泣憂不能起九年
三月卒年八十贈太師謚文貞有司乃論殺稷初正統

初士奇言衛拉特漸強將為邊患而邊軍缺馬恐不能
禦請於附近太僕寺關領西番貢馬亦悉給之士奇歿
未幾額森果入寇有土木之難識者思其言又雅善知
人好推轂寒士所薦達有初未識面者而于謙周忱況
鍾之屬皆用士奇薦居官至一二十年廉能冠天下為
世名臣云次子穉以廕補尚寶丞成化中進太常少卿
掌司事

楊榮字勉仁建安人初名子榮建文二年進士授編修

成祖初入京榮迎謁馬首曰殿下先謁陵乎先即位乎
成祖遽趣駕謁陵自是遂受知既即位簡入文淵閣為
更名榮同值七人榮最少警敏一日晚寧夏報被圍召
七人皆已出獨榮在帝示以奏榮曰寧夏城堅人皆習
戰奏上已十餘日圍解矣夜半果奏圍解帝謂榮曰何
料之審也江西盜起遣使撫諭而令都督韓觀將兵繼
其後賊就撫奏至帝欲賜敕勞觀榮曰計發奏時觀尚
未至不得論功帝益重之再遷至侍講太子立進右諭

德仍兼前職與在直諸臣同賜二品服評議諸司事宜
稱旨復賜衣幣帝威嚴與諸大臣議事未決或至發怒
榮至輒為霽顏事亦遂決五年命往甘肅經畫軍務所
過覽山川形勢察軍民閱城堡還奏武英殿帝大悅值
盛暑親剖瓜噉之尋進右庶子兼職如故明年以父喪
給傳歸既葬起復視事又明年母喪乞歸帝以北行期
迫不許命同胡廣金幼孜扈從甘肅總兵官何福言托
克托布哈等請降需命於額齊訥命榮馳往偕福受降

持節即軍中封福寧遠侯因至寧夏與寧陽侯陳懋規
畫邊務還陳便宜十事帝嘉納之八年從出塞次臚朐
河選勇士三百人為衛不以隸諸將令榮領之師旋餉
不繼榮請盡以供御之餘給軍而令軍中有餘者得相
貸入塞官為倍償軍賴以濟明年乞奔喪命中官護行
還詢閩中民情及歲豐歎榮具以對尋命侍諸皇孫讀
書文華殿十年甘肅守臣宋琥言叛寇婁達哈逃赤斤
蒙古衛且為邊患乃復遣榮至陝西會豐城侯李彬議

兵方畧榮還奏言隆冬非用兵時且有罪僅數人兵未
可出帝從之叛者亦降明年復與廣幼孜從北巡又明
年征衛拉特太孫侍行帝命榮以間陳說經史兼領尚
寶事凡宣詔出令及旗志符驗必得榮奏乃發帝嘗晚
坐行幄召榮計兵食榮對曰擇將屯田訓練有方耕耨
有時即兵食足矣十四年與金幼孜俱進翰林學士仍
兼庶子從還京師明年復從北征十六年胡廣卒命榮
掌翰林院事益見親任諸大臣多忌榮欲疏之共舉為

祭酒帝曰吾固知其可第求代榮者諸大臣乃不敢言
十八年進文淵閣大學士兼學士如故明年定都北京
會三殿災榮麾衛士出圖籍制誥昇東華門外帝褒之
榮與幼孜陳便宜十事報可二十年復從出塞軍事悉
令叅決賚予優渥師還勞將士分四等賜宴樂幼孜皆
列前席受上賞已復下詔征阿魯台或請調建文時江
西所集民兵帝問榮榮曰陛下許民復業且二十年一
旦復徵之非示天下信從之明年從出塞軍務悉委榮

晝夜見無時帝時稱楊學士不名也又明年復從北征
當是時帝凡五出塞士卒饑凍饋運不繼死亡十二三
大軍抵達蘭納穆爾河不見敵帝問羣臣當復進否羣
臣唯唯榮幼孜從容言宜班師帝許之還次榆木川
帝崩中官馬雲等莫知所措密與榮幼孜入御幄議二
人議六師在外去京師尚遠祕不發喪以禮斂銘錫為
柩載輿中所至朝夕進膳如常儀益嚴軍令人莫測或
請因他事為敕馳報皇太子二人曰誰敢爾先帝在則

稱敕賓天而稱敕詐也罪不小衆曰然乃具大行月日
及遺命傳位意啓太子榮與少監海壽先馳訃既至太
子命與蹇義楊士奇議諸所宜行者仁宗即位進太常
卿餘官如故尋進太子少傅謹身殿大學士既而有言
榮當大行時所行喪禮及處分軍事狀帝賜敕褒勞賚
予甚厚進工部尚書食三祿時士奇准皆辭尚書祿榮
幼孜亦固辭不允宣德元年漢王高煦反帝召榮等定
計榮首請帝親征曰彼謂陛下新立必不自行今出不

意以天威臨之事無不濟帝從其計至樂安高煦出降
師還以決策功受上賞賜銀章五褒予甚至三年從帝
巡邊至遵化聞烏梁海將寇邊帝留扈行諸文臣於大
營獨命榮從自將輕騎出喜峯口破敵而還五年進少
傅辭大學士祿九年從巡邊至洗馬林而還英宗即位
委寄如故正統三年與士奇俱進少師五年乞歸展墓
命中官護行還至武林驛而卒年七十贈太師諡文敏
授世襲都指揮使榮歷事四朝謀而能斷永樂末浙閩

山賊起議發兵帝時在塞外奏至以示榮榮曰愚民苦有司不得已相聚自保兵出將益聚不可解遣使招撫當不煩兵從之盜果息安南之棄諸大臣多謂不可獨榮與士奇力言不宜以荒服疲中國其老成持重類如此論事激發不能容人過然遇人觸帝怒致不測往往以微言導帝意輒得解夏原吉李時勉之不死都御史劉觀之從輕典皆賴其力嘗語人曰事君有體進諫有方以悖直取禍吾不為也故其思遇亦始終無間重修

太祖實錄及太宗仁宣三朝實錄皆為總裁官先後賜
賚不可勝計性喜賓客雖貴盛無稍崖岸士多歸心焉
或謂榮處國家大事不愧唐姚崇而不拘小節亦頗類
之家富曾孫業為建安指揮以貲敗詳宦官傳業從弟
旦字晉叔弘治中進士歷官太常卿以忤劉瑾左遷知
温州府治最稍遷浙江提學副使瑾誅累擢至戶部侍
郎督京通倉出理餉甘肅還進右都御史總督兩廣軍
務討平番禺清遠河源諸獠嘉靖初遷知南京吏部尚

書張璠桂萼驟進旦率九卿極言不可會吏部尚書喬
宇罷召旦代之未至為給事中陳洸所劾勒致仕年七
十餘卒

楊溥字弘濟石首人與楊榮同舉進士授編修永樂初
侍皇太子為洗馬太子嘗讀漢書稱張釋之賢溥曰釋
之誠賢非文帝寬仁未得行其志也採文帝事編類以
獻太子大悅久之以喪歸時太子監國命起視事十二
年東宮遣使迎帝遲帝怒黃淮逮至北京繫獄及金問

至帝益怒曰問何人得侍太子下法司鞫連溥逮繫錦
衣衛獄家人供食數絕而帝意不可測旦夕且死溥益
奮讀書不輟繫十年讀經史諸子數周仁宗即位釋出
獄擢翰林學士嘗密疏言事帝褒答之賜鈔幣已念溥
由已故久困尤憐之明年建弘文閣於思善門左選諸
臣有學行者侍值士奇薦侍講王進儒士陳繼蹇義薦
學錄楊敬訓導何澄詔官繼博士敬編修澄給事中日
值閣中命溥掌閣事親授閣印曰朕用卿左右非止學

問欲廣知民事為治道輔有所建白封識以進尋進太常卿兼職如故宣宗即位弘文閣罷召溥入內閣與楊士奇等共典機務居四年以母喪去起復九年遷禮部尚書學士值內閣如故英宗即位與士奇榮請開經筵豫擇講官必得學識平正言行端謹老成達大體者數人供職且請慎選宮中朝夕侍從內臣太后大喜一日太后坐便殿帝西向立召英國公張輔及士奇榮溥尚書胡濙入諭曰卿等老臣嗣君幼幸同心共安社稷又

召溥前曰仁宗皇帝念卿忠屢加歎息不意今尚見卿
溥感泣太后亦泣左右皆悲愴始仁宗為太子被讒宮
寮多死詔獄溥及黃淮一繫十年瀕死者數矣仁宗時
時於宮中念諸臣太后亦久憐之故為溥言之如此太
后復頷帝曰此五臣三朝簡任俾輔後人皇帝萬幾宜
與五臣共計正統三年宣宗實錄成進少保武英殿大
學士溥後士奇榮二十餘年入閣至是乃與士奇榮竝
六年歸省墓尋還是時王振尚未橫天下清平朝無失

政中外臣民翕然稱三楊以居第目士奇曰西楊榮曰東楊而溥嘗自署郡望曰南郡因號為南楊溥質直廉靜無城府性恭謹每入朝循牆而走諸大臣論事爭可否或至違言溥平心處之諸大臣皆歎服時謂士奇有學行榮有才識溥有雅操皆人所不及云比榮士奇相繼卒在閣者馬愉高穀曹鼐皆後進望輕溥孤立王振益用事十一年七月溥卒年七十五贈太師謚文定官其孫壽尚寶司丞後三年振遂導英宗北征陷土木幾

至大亂時人追思此三人者在當不至此而後起者爭
暴其短以為依違中旨釀成賊奄之禍亦過刻之端也
馬愉字性和臨朐人宣德二年進士第一授翰林修撰
九年秋特簡史官及庶吉士三十七人進學文淵閣以
愉為首正統元年充經筵講官再遷至侍讀學士時王
振用事一日語楊士奇榮曰朝廷事久勞公等公等皆
高年倦矣士奇曰老臣盡瘁報國死而後已榮曰吾輩
衰殘無以効力當擇後生可任者報聖恩耳振喜而退

士奇咎榮失言榮曰彼厭吾輩矣一旦內中出片紙令某人入閣且奈何及此時進一二賢者同心協力尚可為也士奇以為然翼日遂列侍讀學士苗衷侍講曹芻及愉名以進由是愉被擢用五年詔以本官入內閣叅預機務尋進禮部右侍郎十二年卒贈尚書兼學士贈官兼職自愉始愉端重簡默門無私謁論事務寬厚嘗奏天下獄久者多瘐死宜簡使者分道決遣帝納焉邊警方命將而別部使至衆議執之愉言賞善罰惡為治

之本波及於善非法乘人之來執之不武帝然之厚遣其使

贊曰成祖時士奇榮與解縉等同直內閣溥亦同為仁宗宮僚而三人逮事四朝為時者碩溥入閣雖後德望相亞是以明稱賢相必首三楊均能原本儒術通達事幾協力相資靖共匪懈史稱房杜持衆美効之君輔贊彌縫而藏諸用又稱姚崇善應變以成天下之務宋璟善守文以持天下之正三楊其庶幾乎

明史卷一百四十八

欽定四庫全書

明史卷一百四十八考證

楊士奇傳早孤隨母適羅氏已而復宗

臣章宗瀛按

士奇又字僑仲其隨母適羅氏也年甫六歲見其家
歲時祭祀不令陪禮問之母悉其故即私於別室祀
先世羅家人密窺之見其拜泣如成人禮後遂命復
姓楊氏見明陳賞所撰東里先生小傳謹附考

楊士奇傳下錦衣衛獄旬日而釋

臣章宗瀛按永樂

實錄士奇以二十年九月壬戌逮繫以癸酉復職計
十二日謹附考

楊士奇傳楊榮力贊之因傳旨令士奇草敕詰趙王士
奇曰事當有實天地鬼神可欺乎榮厲聲曰汝欲撓
大計耶舊作榮力贊決士奇曰何謂無辭臣章宗

瀛按獻徵錄載是時楊榮傳旨命士奇草敕詰趙王
惟楊士奇與溥意合約同力諫榮已先入二人乃繼
之闔者不納敘述甚詳傳既未敘明傳旨事似乎在

仁宗前力爭者此處又云榮先入士奇繼之而不及
溥於當日情事未能條晰擬改榮力贊決句作楊榮
力贊之下增因傳旨令士奇草敕詰趙王句而刪去
今逆黨言二句又改五頁前三行士奇二字作二人
以字數計之於原板亦相符合謹識 舊本下文又
云榮先入士奇繼之間者不納尋召義原吉入

楊士奇傳

臣

章宗瀛按東里小傳載士奇弱冠時曾

攝琴江教事時縣有獲偽鈔者令疑其偽造榜掠備

至不伏士奇問裝中尚有真鈔乎曰有之士奇曰山谷人不辨真偽邂逅售得之乃欲重治其罪不可令遂釋之其人懷白金五十兩夜詣謝士奇厲聲斥去焉事雖小其建立大節已兆於此謹附考

楊榮傳劉觀之從輕典皆賴其力

臣章宗瀛按劉觀

傳觀因私納賄賂御史文章劾之并其子輻諸不法事宣宗怒將置重典榮與楊士奇乞貸其死因謫輻戍遼東而命觀隨往是無戍名而已有其實傳云免

戍邊未的擬改從輕典三字謹識

明史卷一百四十八考證